

每週經課朗誦經文(巴克禮台語漢字)2013/02/03

共同經課 - 1

耶利米書一章四節~十節

4 耶和華的話臨到我講：5 我未創造你佇腹肚內的代先，我識你；你未出胎的代先，我分別你做聖；設立你做列國的先知。6 我就講：嘻啊！主耶和華啊，你看，我袂曉講，因為我是囡仔。7 總是耶和華對我講：你毋通講我是囡仔，因為我見有差你，你著去；我見有吩咐你，你著講。8 你莫得驚in，因為我及你佇啲，欲救你。這是耶和華講的。9 耶和華就伸伊的手摸我的嘴，耶和華給我講：你看，我有將我的話下佇你的嘴。10 看啊，今仔日我設立你佇列邦列國的頂面，是為著欲拔出、欲拆毀、欲敗壞、欲搥倒，欲建立、欲栽培。

共同經課 - 2

詩篇七十一篇一節~六節

1 耶和華啊，我倚靠你；求你互我永永無見誚！2 照你的公義拯救我，互我脫離；俯耳孔聽我，來救我！3 求你做我通倚起的石磐，互我常常去踮遐；你已經命令欲救我，因為你是我的山巖，我的山寨。4 我的上帝啊，求你救我脫離歹人的手，脫離不義及殘忍的人的手頭。5 因為主——耶和華，你是我所向望的；對我少年的時，你是我所倚靠的。6 我對胎裡互你扶持；互我出老母的腹肚的是你。我欲常常謳啫你！

共同經課 - 3

哥林多前書十三章一節~十三節

1 我設使會講人及天使的音語，若無仁愛，我就成做響的銅器，鳴的鐃鈸。2 我設使做先知明白攏總的奧妙，及攏總的知識，閣設使有齊備的信，夠額來移山，若無仁愛，我就袂算做是甚麼。3 我設使盡所有的來賑濟，閣獻我的身軀互火燒，若無仁愛，就我無得著利益。4 仁愛是夯(Gâu)寬容、慈悲；仁愛是無怨妒；仁愛無誇口，無品嘮，5 無行見誚的事，無求家己的利益，無快受氣，無記得人的歹，6 無歡喜不義，是及真理相及歡喜；7 凡事忍受，凡事相信，凡事向望，凡事吞悞。8 仁愛永遠袂無去。若是先知的職欲廢無；許個音語欲息知識欲廢無。9 因為咱所知的無完全，做先知也無完全，10 完全若到，無完全的就廢無。11 我做囡仔的時，講話親像囡仔，性情親像囡仔，意見親像囡仔，已經成人，就廢無囡仔的事。12 因為咱今對鏡啲看，霧霧無明，若是到彼時就當頭對面。我今所知無完全，到彼時就知，親像我互主知一樣。13 現今所存的就是信、向望、仁愛此三項，其中第一大的是仁愛。

共同經課 - 4

路加福音四章二十一節~三十節

21 伊就開嘴對in講：「此個聖經的應驗，恁今仔日有聽見啦。」22 眾人攏干證伊，奇怪伊的嘴所出恩典的話；就講：「此個豈毋是約瑟的子嗎？」23 伊就對in講：「恁的確引此個俗語對我講：『醫生啊，你著家己醫！見若阮聽見你行佇迦百農的，也著行佇遮，就是你的本所在』」；24 閣講：「我實在給恁講，未有先知佇本所在互人接納伊。25 若是我真實給恁講，當以利亞的時，天亢旱三年半，遍地大飢荒，彼時，以色列中有多多守寡人，26 以利亞未曾奉差去尋in一人，只有去西頓的撒勒法尋一個守寡人。27 閣先知以利沙的時，以色列中有多多癩疙(thái-ko)的，其中無一人得著清氣，只有敘利亞人乃縵若定。」28 佇會堂的人聽見諸個話，攏滿心受氣，29 就起來趕伊出城外（in的城起佇山頂）；眾人帶伊到山坎，欲給伊搥落去。30 若是耶穌對in中間行過，做伊去。